

Dicta etiam est *Fabiana*. Otto Frisingensis lib. I Histor. Frid. cap. xxxii. Dux tunc demum terga hosti dare compellitur, & periculis belli exemptus, in vicinum Opidum Viennis, quod olim a Romanis inhabitatum *Fabiana* dicebatur, declinavit. Similiter legas in Historia Severini Episcopi Viennensis. Atque ad hanc adpellationem maxime accedit vulgata & trita apud Adcolas appellatio *Biana*. Idem Lazijs *Vendum* a Strabone appellari ait. *Pannoniam Urbem* eam vocat Iornandes: vernacule *Wien*; *Wydne* Sclavonice. Hanc Urbem Turcas *Beet* vocare ex D. Carolo Rimio quondam apud Zelimum Turcarum Imperatorem Oratore se habere scribit Ortelius. *Wetsch* vocat Leunclavius: item *Beet*. Urbs clarissima, ad Danubium Fluvium sita, Imperatoria sede nobilis: inexpugnabili murorum ambitu, præaltis fossis, aggere & vallo cingitur. Mœnia deinde spissa & sublimia, frequentes Turres, & Propugnacula ad bellum opportuna habet: ut Vienna sit munitissimum adversus Turcarum furorem Propugnaculum & Munimentum. Suburbia maxima sunt & ambitiosa. Aedes Civium amplæ, area & picturis ornata, structura solida & firma, altæ domorum facies, magnificæque visuntur. Templâ Sanctis dicata, & amplâ & splendida sæcto lapide constructa, perlucida sunt, & Columnarum ordinibus admiranda. Cellæ vinariæ adeo profundæ sunt & spatiosæ, ut sub terra non minus, quam supra terram ædificiorum esse feratur. Platearum solum stratum lapide duro, ut neque plaustorum rotis facile conteratur. Annona & potissimum vini incredibilis copia, ita ut ducentos & mille Equos XL dierum vindemia exerceat. Christianam Religionem admisit anno cccclxiv Doctore Severino, qui etiam ibi Basilicas extruxit. Historia hujus Urbis peti potest a Lazio & Ottone Frisingensi. Urbem Fredericus II ornavit auxitque: ut & sequentes fere omnes Austriæ Duces. Nobilissimum in ea Gymnasium Artium Scientiarumque constitutum est a *Friderico* Imperatore: renovatum postea ab *Alberto* Archiduce anno cccccvi. Id postea seditionibus inter studiosos gliscentibus collapsum subversumque est. Viennæ clari fuere Wolfgangus Lazijs Medicus & Historicus Ferdinandi Imperatoris: Julius Alexandrinus, Mathias Farinator. Fuit & Theologiæ Professor in Academia Viennensi Iohannes Haselbach, qui adeo diffuse solebat explicare, quæ auditoribus proposita enarrabat, ut viginti unum annos legens in Esaiâ Propheta, ad finem primi capitis non pervenerit. Claram urbem fecit obsidio Turcarum anno cixcxix fortiter a Civibus tolerata, in qua Turcarum lxxx millia periisse memorantur. Est & in Austria Superiore *Gmunda*, Opidum quidem non ita magnum, quod tamen venustate & elegantia commendatur, situm ad Lacum qui inde adpellationem trahens *Gmundanus Lacus*, dicitur, ex quo Austriæ Flumen Dravus oritur. *Gmunda* magna & lucrosa est negotiatio Salis, quod præstans & acre ex vicinis Montibus effoditur, & *Gmundam* allatum, vasculis (quæ patria lingua, *Krvelen* indigitant) impositum per Dravum in Danubium transportatur, unde Viennæ & in aliis Austriæ, Hungariæ, Stiriæ, Carinthiæ vicinisque Civitatibus magno commodo & lucro *Gmundanorum* distrahitur. Urbes præterea & antiquæ & nobiles multæ in Austria sunt, maxime tamen insignes *Linzium*, *Strya*, *Wadenhoffum*, *Melicum*, Castellum antiquitus Claudionum: *Cremisum*, *Cetro Castellum*, hodie *Zeisselmaur*, *Santohippolytus*, *Neuburgum* duplex, alterum a Cœnobio, a frumento alterum dictum